

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. मुख्यमंत्री उमर अब्दुल्ला होरें बजट शा पैहले आहले परामर्श तैहत् लोकें दे नुमायंदे कन्नै बैठका लाइयां। बजट च सब्बने दे बचार गी शामिल करने पर जोर पाया।
2. केन्द्रीय मंत्री नितिन गडकरी होरें आखेआ जे जम्मू कश्मीर च दिल्ली-अमृतसर-कटरा ग्रीनफील्ड एक्सप्रेस वे दा 144 किलोमीटर हिस्सा मार्च 2026 तगर मुकम्मल होई जाग।
3. राई-बाई मंत्री जावेद अहमद डार होरें टकोहदे इलाकें च िड़ने आलिएं फसलें, करसानें दे सशक्तिकरण ते नमिएं काह्डें पर जोर पाया। मंत्री होरें मैहकमे दे कम्मकाज दा जायजा लैता।
4. राजौरी जिले च चला'रदी जांच तैहत् कीटनाशकें ते हेले दे 529 नमूने लैते गे। मुख्य सचिव होरें बडहाल दे बसनीकें दी हिफाजत लेई अपनाए जा'रदे तरीकाकारें दा जायजा लैता।
5. सीआरपीएफ दे डीजी होरें राजौरी दी सुरक्षा स्थिति दा जायजा लैता ते उपराज्यपाल हुंदे कन्नै मलाटी कीती।

<><><><><><>

CM-Pre Budget

मुख्यमंत्री उमर अब्दुल्ला होरें बजट थमां पैहले विधायकें ते जिला विकास कौंसल दे अध्यक्षें कन्नै बैठका लाइयां। उनें बजट च लोकें दी हिस्सेदारी पर जोर पाया। बारामुला, उधमपुर, कुलगाम, रामबन, अनंतनाग, कटुआ, सांबा ते बडगाम थमां दे नुमायंदे बक्ख-बक्ख मामलें गी पुट्टेआ जिंदे च शिड़क-सेहत सरबंधी दिक्खभाल, बिजली, पानी दी सप्लाई ते शिक्षा सरबंधी मामले शामिल हे। मुख्यमंत्री होरें भरसा दोआया जे बजट मकामी लोकें दी आसैं-तांगें दी जरूरते गी पूरा करोग। बैठक च मंत्रिएं, वरिष्ठ अधिकारिएं ते सलाहकारें हिस्सा लैता। सरकार दा मकसद लोकें दी आसैं तांगें मूजब बजट गी बनाने ते मुद्दें गी प्राथमिकता देना ऐ।

<><><><><><>

Gadkari

जम्मू कश्मीर च दिल्ली-अमृतसर-कटरा ग्रीनफील्ड एक्सप्रेस वे मार्च 2026 तगर मुकम्मल होई जाग। इस बारे लोकसभा च जानकारी दिंदे होई शिड़क, यातायात ते राष्ट्री जरनैली शिड़क दे मैहकमे आली मंत्री नितिन गडकरी होरें आखेआ जे जम्मू कश्मीर च 5 शा 3 पैकेज इस ब8रे सितम्बर तोड़ी तैआर होई जांगन। 144

किलोमीटर लम्मे इस पैंडे, जेह्दे च हरियाणा-पंजाब ते जम्मू कश्मीर शामिल न, 18 पैकेज आले प्रोजेक्ट दा हिस्सा ऐ।

<><><><><><>

LG-Seil Tour(byte)

उपराज्यपाल मनोज सिन्हा होरें युवाएं गी इक मजबूत ते विकसित भारत बनाने लेई सामूहिक तौरा उप्पर कम्म करने दा आह्वान कीता ऐ। उनें युवाएं गी आखेआ जे ओह समाज दे कमजोर तबकें दी जरूतें उप्पर ध्यान देन तां जे ओह विकास प्रक्रिया च हिस्सा लेई सकन ते चौतरफा तरक्की च योगदान देई सकन। एल.जी मनोज सिन्हा होरें एह गल्ल अज्ज आयोजित इंटर स्टेट लिविंग च स्टूडेंट्स एक्सपीरियंस टूरर राष्ट्रीय एकात्मा जात्तरा 2025 दे समापन समारोह गी संबोधित करदे होई आक्खी। 3 फरवरी थमां शुरू होई दी इस जात्तरा दा आयोजन अखिल भारतीय विद्यार्थी परिषद नै कीता हा। इस मौके उप्पर बोलदे होई एल.जी होरें आखेआ।

<><><><><><>

Agriculture Minister

राई-बाई ते ग्रामीण विकास मंत्री जावेद अहमद डार होरें राई-बाई मैहकमे दे कम्मकाज दी समीक्षा कीती। इस मौके पर डार होरें नवाचार, करसानें गी सहायता ते टिकाऊ विकास पर जोर पाया। मंत्री होरें टकोह्दे इलाके च उगने आली टकोह्दिएं फसलें गी बढ़ावा देने, प्रगतिशील राई-बाई ते सरकारी योजनाएं बारे जागरूक होने पर बी जोर पाया। जावेद डार होरें सिंचाई च सुधार समें सिर बीएं दी बंड ते राई-बाई आली मशीनरी गी तेजी कन्नै उपलब्ध कराने आस्तै बी गलाया। मंत्री होरें मशरूम दी रड़, वरमिककंपोस्टिंग ते मिलेट रेस्टोरेंटें च कामयाबी हासल करने लेई कठुआ जिले दी तरीफ कीती।

<><><><><><>

Lal Draman

लाल द्रमन च विंटर उत्सव कल थमां शुरू होआ'रदा ऐ, एह्दे लेई तैआरियां जोरें शोरें कन्ने जारी न। डिप्टी कमीशनर हरविंदर सिंह होरें इस बारे इक जायजा बैठक लाई। उत्सव दरान सांस्कृतिक गतिविधियां, फलैंग रैली, खेड्ड गतिविधियां होंगन ते बूह्टे लाने सरबंधी मुहिम चलाई जाग। इस उत्सव गी सुचारू ढंगै सिर करोआने लेई जिम्मेदारियां लाइयां गेइयां न। एह्दा सरिस्ता जिला प्रशासन डोडा, इक गैर सरकारी संगठन तेजस-एक पैहल आस्सेआ कीता जा'रदा ऐ।

<><><><><><>

Rajouri Samples

राजौरी दे बडहाल ग्रां च चला'रदी जांच तैह्त्त बक्ख-बक्ख चाल्ली दे कीटनाशकें ते हैलें दे 529 नमूने लैते गे न। एह जांच रहस्यमयी बमारी करी उत्थें होई दी मौतें दे सिलसिले च कीती जा'रदी ऐ। डिप्टी कमीशनर अभिषेक शर्मा हुंदी अगुवाई आली टीम नै 257 दुकानें दी शनाख्त कीती ते नमूने लैते। 293 नमूने राई-बाई च इस्तेमाल होने आले एगो-कैमिकलें दे न ते 236 नमूने हैलें दे न। इस टीम च प्रशासन अधिकारी, पुलस, सेहत ते राई-बाई मैह्कमे दे लोक शामिल हे।

<><><><><><>

CS-Badhaal

मुख्य सचिव अटल डुल्लू होरें राजौरी जिले दे बडहाल ग्रां च होई दिएं रहस्यमयी मौतें दे बाद उत्थें कीते गेदे जतनें दा जायजा लैने लेई सेहत, पुलस ते राश्ट्री माहिरें कन्नै इक होर बैठक कीती। बैठक दी अध्यक्षता करदे होई मुख्य सचिव होरें व्यापक जांच ते अस्पताल दे ढांचे गी होर मजबूत करने पर जोर पाया। बैठक च एम्स ते होरने संस्थानें गी भविष्य च कीते जाने आली कारवाइएँ गी अंजाम देने लेई मैडिकल ट्रेनिंग देने च मदाद देने आस्तै आखेआ गेआ। बडहाल ग्रां च हुन तगर रहस्यमयी बमारी कन्नै 17 लोकें दी मौत होई ऐ ते 38 लोक जेह्ड़े इस बमारी थमां बमार हे, ओह ठीक होई गे न। 360 शा मते लोकें गी क्वार्टीन कीता गेदा ऐ ते अजें बी सख्ती कन्नै निगरानी कीती जा'रदी ऐ।

<><><><><><>

DG-CRPF

केन्द्रीय रिजर्व पुलस बल दे डरैक्टर जनरल जी.पी.सिंह होरें राजौरी च बलें दे बक्ख-बक्ख शिविरें दा दौरा लाया। आकाशवाणी जम्मू संवाददाता दी रिपोर्ट मूजब डीजी होरें जिले दी सुरक्षा स्थिति ते कारवाइएँ सरबन्धी तैआरिएँ दा जायजा लैता। डीली होरें कालाकोट च नमें कायम कैप दा दौरा लाया। उनें पूरी निष्ठा कन्नै ड्यूटी करने ते कम्म ते जीवन बश्कार बेहतर तालमेल बनाने पर जोर पाया। एह्दे थमां पैहले उनें उपराज्यपाल मनोज सिन्हा हुंदे कन्नै मलाटी कीती। सीआरपीएफ दे डीजी होर जम्मू कश्मीर दे 2 दिन दे दौरे पर न।

<><><><><><>

Ayush Ramban

लोकें दी नरोई सेहत ते सेहतमंद जीवन गी बढावा देने दे मकसद कन्नै आयूष मैह्कमा रामबन खित्ते च कम्म करा'रदा ऐ। जतनें तैह्त्त मैह्कमे आस्सेआ केई सारे जागरूकता कैप लाए जा'रदे न तां जे युवाएँ गी मोबाइल फोन दी लत ते नशीले पद्धार्थें दे माड़े असर बारे जानकार बनाया जाई सकै। शिविरें राएँ विद्याथ्रिएँ गी

सेहतमंद जीवन लेई शैल आदतां ते अनुशासन बनाने लेई प्रेरित कीता जा'रदा ऐ। आकाशवाणी समाचार कन्नै इनें जतनें बारे गल्ल करदे होई वरिष्ठ मैडिकल अफसर ते जिले दे योग कोआर्डिनेटर डॉ. मसूद इकबाल ।

<><><><><><>

Nutri Mix Training

राश्ट्री ग्रामीण आजीविका मिशन तैहत पुंछ दे कृषि विज्ञान केन्द्र आस्सेआ आयोजित “स्तनपान ते गर्भवति महिलाएं लेई न्यूट्री मिक्स फारमुला दी तैआरी बारे त्रै रोजा सिखलाई कार्यक्रम कल संपन्न होई गेआ। इस कार्यक्रम च जिले दे बक्ख-बक्ख थाहरें थमां 30 कोला मती महिलाएं बड़े उत्साह कन्नै हिस्सा लैता। एह पैहलकदमी केवीके पुंछ आस्सेआ ग्रामीण महिलाएं च सेहत सरबन्धी जागरूकता गी बढ़ावा देने लेई कीती गई ही। प्रतिभागिएं इस सि,गलाई कार्यक्रम लेई मैहकमे दी सराहना कीती ते कन्नै धन्नबाद बी कीता। इस मौके पर बोलदे होई केवीके पुंछ दे सांइटिस्ट डॉ. मुज्जफर मीर होरें आखेआ।

<><><><><><>